
*Mwanakazi
Yura
Yezebeli*

by

Rev. William Marrion Branham

Mwanakazi Yura Yezebeli

NTCHENYO



Chivumbuzi 2:20, “Kweni cheneichi nkhususka, chakuti ukuzomerezga (ukulekela) mwanakazi yura Yezebeli, mweneuyu wakujizunura kuti ntchimikazi, ndipo wakusambizga na kusonga wazga wane kuchita uzaghari, na kurya sembe za vikozgo.”

Sono na vesi ili ine nkhusumba imwe kuti mukhilire musi pa vesi 23 nakuwona chisimikizgo chikuru chaunenesko cheneicho ine nakhara nkhwiza nacho kwa imwe nyengo yose iyi. “Ndipo wana wake nditi ndiwakomenge na nyifwa; ndipo maekleziya ghose ghati ghamanyenge kuti Ine ndine wakusanda sana namitima.” Ine nakhara nkhuwowa nyengo ghose iyi kuti pali mipingo yiwiri, nanga uli Mzimu ukuyowoya ku yose yiwiri mu’muwiro uli wose ngati nipara iyo yili waka *umoza*. Apa kwayowoyeka pakweru kuti pali *mipingo* yiwiri, ndipo kwandulika pakweru kuti yinji ya mipingo iyo mwakuwonekerathu yikumanya YAYI kuti Iyo ndiyo Yumoza Mweneuyu wakusanda sana namitima. Iyo wasimikizgirenge kwa iwo kuti ivyo ndimo vilili. Sono pera, yizamuwa mipingo nji yeneiyo yikumanya yayi unenesko uwu? Enya nadi niguru la mpheka ya utesi chifukwa wakugomezga waunenesko mwakufikapo wakumanya kuti njeruzgo yikwambira munyumba ya Chiuta, ndipo iwo pakuwa wakopa-Chiuta, wakujeruzga iwo wene mwakuti iwo wangeruzgikanga yayi.

Sono chifukwa uli Chiuta wakuchema mipingo iyi kuwa mipingo Yake nangauli iyo ni mpheka ya utesi? Unenesko wankhani ngwakuti iwo mba Khristu. Kweni iwo mba Khristu wa Mzimu yayi. Iwo mba Khristu wathupi. Iwo wakutora Zina mwawaka. Mariko 7:7, “Kweni wakunisopa waka, wakusambizga marango gha wanthu nga ndi visambizgo.” Kweni enya nadi iwo mba Khristu pakuti ntchichi chinyakheso cheneicho iwo wangawa? Wamuhamedi ngwa Muhamadi. Icho ndicho chisopo chake paliye kanthu naumo iyo wakukhalira umoyo wa icho chifukwa iyo wakuwirako mukayowoyero kucheneicho Korani yikusambizga. Kwakulingana mu Khristu nimu Khristu malingana iyo wakuzomerezga

fundo yakuti Yesu ni Mwana wa Chiuta, wakubabika na mwali wakulangwa, wakapayikika na kufwa na kuwukaso, nakuti Iyo ni Muwomboli wamutundu wa wanthu, navinyake vyantheura. (*Mwaunenesko, M'muwiro wa Laodikeya muzamukuwa iwo weneawo wakujizunura iwo wene kuwa Khristu chifukwa iwo wakuzomerazga kuwukhariro uweme wa Yesu, ukuwakujisungira kwa iwo wene mazaza ghakukana Uchiuta Wake. Wakhristu wa zeru za unthu wachita kale icho chimozamoza ngati umba unandi weneuwo ukupharazga makani ghaweme gha chitukuku*). Iyo ni Mkhristu mwazina ndipo ngwa mpingo. Kweni Iyo ni MUNENESKA yayi panji wakugomezga wa Uzimu. Wakugomezga wa mutundu uwo ndi mweneuyo wabapatizikira muthupi la Khristu ndipo ntchiwaro cha Iyo. Kweni ndipouli, vilimudongosoro la Chiuta kuti duru wamelere pamoza na tiligu ndipo ivyo vikwenera kuti vizgulike yayi. Iro ni languro la Chiuta. Zuwa lawo lakuvikakira na kuvyotcha likwiza; kweni lichali lindize.

Sono Mzimu ukuyowoya kuwumba wachisazga uwu. Kulwandi limoza Iyo wakurumba, ndipo kulinyake Iyo wakuchenya. Iyo waphara cheneicho ntchakurunjika na wakugomezga waunenesko. Sono Iyo wakuchenjezga cheneicho mpheska ya utesi yikwenera kuchita usange njakuti yime yakurunjiskika panthazi za Yehova.

MWANAKAZI YURA YEZEBELI

Muteweti Yakobe wakatiwoneska ise nthowa yeneiyo kwananga kukutora. Yakobe 1:14–15, “Kweni munthu yose wakuyezgeka para wasongeka ndipo wakopeka na khumbiro lake. Ndipo udokezi para wayima, ukubaba kwananga, ndipo para kwananga kwakura kukubaba nyifwa.” Sono icho ntchithuzithuzi cheneko cheneicho chikuchitika m'muwiro ya mipingo. Ngati umo kwananga kukayambira muchirichose yayi kweni kukhwaskika, ndimoso nyifwa ku mpingo yikayambira na twakuchefyeka, twakuchita tuchoko twakuwoneka twa Wanikolayiti. Kufuma pa twakuchita vikaluta kuchisambizgo. Kufuma pa chisambizgo vikakumbatira nkhangono ya boma na kwambiska ufambi. Sono m'muwiro uwu vikuluta kumweneko ntchimikazi (musambizgi) ndipo nthoora pera vikwenda nipera visuke vijisange ivyo vyene munyanja ya moto, pakuti uko ndiko nkhanira ivyo vyamumalira, munyifwa ya chiwiri.

Sono kulira kose kwa Chiuta kwakwimikanana muwiro uwu wachinayi kukusangika mukuchonjora Kwake kwa ntchimikazi iyi, Yezebeli. Ndipo kuti mupulikiske chifukwa cheneko icho lyo wakuyichonjolera iyo ntheura, ise tikwenera kulawiska mbiri yake mu Baiboro ndipo para ise tasanga cheneicho iyo yikachita kumasinda kura, ise timanyenge cheneicho chikuchitika pa nyengo iyi.

Chinthu chakudanga na chakuzirwa chomene cheneicho ise tikusambira za Yezebeli ntchakuti iyo ni mwana mwanakazi wa Abraham YAYI, nangakungawa kunjizgika kwake mufuko la Israeli kukawa kunjira kwa Uzimu yayi ngati umo kukawira kura kwa Rute, Wachimoabu. Yayi bwana. Mwanakazi uyu wakawa mwana mwanakazi wa Ethbaal, Themba la Sidon (Mathemba Yakudanga 16:31), mweneuyo wakawa msofi kwa Astarte. Iyo wakatora mpando wachifumu pakukoma wapanthazi zake, Pheles. Ntheura ise tikuwona pakweru kuti iyo wakawa mwana mwanakazi wachigewenga chakukoma. (Cheneichi chikutikumbuska nkhanira ise za Kaini.) Ndipo nthowa yeneiyo iyo wakazgokera kuwa chigawa cha Israeli yikawa yakwizira muzinthowa za uzimu yayi zeneizo Chiuta wakimikira wa Mutundu kuti wanjiliremo; kweni iyo wakanjiramo kwizira MUNTENGWA na Ahabu, themba la mafuko khumi gha Israeli. Sono kubatikana uku ngati umo ise tawonera kukawa kwa Uzimu yayi; yikawa yandyare. Ndipo ntheura mwanakazi uyu mweneuyo wakawa wakuzama mukusopa vikozgo wakawavya na khumbiro na lichoko kuti wazgoke musopi wa Chiuta Yumoza Unenesko, kweni m'maro mwake iyo wakiza na virato vyeneivyo iyo wakarapizga vyakung'anamura Israeli kufuma kwa Yehova. Sono Israeli (mafuko khumi) wakawa kuti wakumanya kale cheneicho chikawa kusopa mathore gha golide, kweni pa nyengo iyi iwo wakawa wachali wandaguliskike kuyaka sopo vikozgo, pakuti Chiuta wakasopekanga ndipo dango la Moses likasungikanga. Kweni kufuma pa nyengo ya nthengwa ya Ahab kwa Yezebeli, kusopa vikozgo kukalutilire mwa nyifwa vikawa pa nyengo yeneiyo mwanakazi uyu wakawa msofikazi m'matempiri sheneagho iyo wakimikira kwa Astarte (Venus) na Baala (chiuta zuwa) mwakuti Israeli wakafika pa nyengo yakofya ya umoyo wake.

Na ichi m'maghanoghano ise sono tingayamba kuwona cheneicho Mzimu wa Chiuta ukukhazikiska Mmuwiro uwu wa Tiyatira. Ni ivi apa.

Ahab wakatora Yezebeli ndipo iyo wakachita ichi muwuchitiro wa ndyare kuti wakhozge ufumu wake na kuwuvikilira iwo. Cheneicho ndicho nadi mpingo ukachita para ukatengwa pasi pa Kositantini. Iwo wakawungana pamoza pavifukwa vyandyare, nangauli iwo wakuwikako kawiro kauzimu kwa ivyo. Sono paliye nanga njumoza mweneuyo wanganikholweska ine kuti Kositantini wakawa mu Khristu. Iyo wakawa wambula kupulikira ndipo vikawonekanga ngati vipingo vya wa Khristu. Iyo wakaphakapo mphinjika za utoto utuwa pa viskango vya wasilikari. Iyo ndiyo wakawa chata wa wankhondo wa Kolambasi. Iyo wakawika mphinjika pa tempele la Sofiya Mtuwa na kwambiska mutheto.

Yikawa fundo ya Kositantini kutolera waliyose pamoza, wambula kugomezga, wa Khristu mwazina waka nawa na wa Khristu waunenesko. Ndipo kwa kanyengo vikawonekanga ngati nipara iyo waluskenge pakuti wakugomezga weneko wakiza nawo kuti wawone usange iwo wangawawezga wezgaso waji weneawo wakapambuka kufuma ku Mazgu. Para iwo wakati waona kuti iwo wangawawezgaso yayi kwiza kuwunenesko, iwo wakawa wakuchichizgika kuwukako ku gulu la ndyare. Ndipo para iwo wakachita ntheura, iwo wakachemeka wamupatuko ndipo wakazikizgikanga.

Lekani ine niyowoye pano kuti ise tili na chinthu chenechichi ichi chikuchitika sono ntheura. Wanthu wose wakwiza pamoza. Iwo wakulemba Baiboro leneiro lizamuyana waliyose kwali wawe Muyuda, Katolika, panji wa Mupatuko. Iwo wali na Mphara yawo na yawo ya Nicene kweni iwo wakuyichema kuti Mphara ya Visopo. Ndipo kasi imwe mukuwamanya weneawo mabungwe ghose agha ghakutimba? Igho ghakutimba wa Pentekosite waunenesko. Ine nkhung'anamura bungwe leneiro likuchemeka Pentekosite yayi. Ine nkhung'anamura iwo weneawo mba Pentekosite chifukwa iwo mbakuzuzgika na Mzimu Mtuwa ndipo wali na vimanyikwiro na vyawanangwa pakati pawo chifukwa wakwenda muwunenesko.

Para Ahabu wakatora Yezebeli pa vifukwa vyandyare iyo wakaguliska wanangwa wake wakubabika nawo. Imwe para mwabatikana na bungwe ndikuti imwe mwaguliska wanangwa winu wakubabika nawo, mubale, kwali imwe mukukhumba kuchigomezga ichi panji yayi. Mupatuko

uliwose weneuwo ukafumako na kuwelerakoso ukaguliska wanangwa wake wakubabika nawo, ndipo para imwe mwaguliska wanangwa winu wakubabika nawo, imwe mukuyana waka na Esau — imwe mungalira na kulapa vyose iyo mukukhumba, kweni vimuchitiraninge uweme uliwose yayi. Pali waka chinthu chimoza icho mungachita ndipo cheneicho ndicho, “Fumanimo mwa iyo, wanthu wane, ndipo muleke kusangana na zakwananga zake!” Sono usange imwe mukughanaghana kuti ine nkhuneneska yayi, zgorani waka fumbo limoza ili. Kasi munthu waliyose wamoyo wanganiphalira ine ni mpingo ngu panji ntchakuchitika uli cheneicho chikawapo na chithuwusko ndipo chikaweleraso pamasinda pakuti iwo wanjira mubungwe ndipo wazgokaso chisopo? Welengani mbiri. Imwe mungawusanga yayi umoza — naumoza yayi.

Likawa ora la pakati apo usiku kwa Israeli wakabatikana na charu na kuleka vya Uzimu chifukwa cha ndyare. Likawa ora la pakati pa usiku pa Nicaea peneapo mpingo ukachita chinthu chantheura ichi. Ni ora la pakati pa usiku sono apo mipingo yikwiza pamoza.

Sono para Ahabu wakatora Yezebeli iyo wakamuzomelezga iyo kutora ndarama za boma na kwimika nyumba ziwiri zikuru za chisopo kwa Astarte na Baala. Iyo wakimikira Baala yikawa yikuru chomene kuti Israeli yose yikamanga kwiza na kusopera penepapo. Ndipo apo Kositantini na mpingo wakati wakwatisa iyo wakapeleka nyumba za mpingo, na kwimika maguwa na vikozgo, na kuwunganya maudindo gheneagho ghakawa kuti ghambako kale kuwumbika.

Para Yezebeli wakatora nkhangono za boma iyo wakachichizga chisopo chake pa wanthu na kukoma zintchimi na wasofi wa Chiuta. Vikasuzga chomene mwakuti Eliya, thenga mu nyengo yake, wakaghanaghana kuti iyo ndiyo yekha uyo wakakharako; kweni Chiuta wakawa na 7000 wanyakeso weneawo kuti wakajikamira khongono kwa Baala yayi. Ndipo sono nthenda kura kuwaro pakati pa visopo vya Bapatistiti, Methodistiti, Purezibeteri, navinyake vya nthaura, pali wanji weneawo wazamufumamo na kwizaso kwa Chiuta. Ine nkhuukhumba imwe mumanya kuti ine kuti, sono, ndipo nindakharepo wakususkana na wanthu. Nimabungwe — kaluso ka maupu ndiko ine nkhususkana nako. Ine nkhwenera kukasuska chifukwa Chiuta wakukatinkha iko.

Sono tiyeni ise tiyime kwa ka miniti apa ndipo tiwelezgeso cheneicho ise tikayowoya kwakulingana na kasopero mu Tiyatira. Ine nkhayowoya kuti iwo wakasopanga Apollo (mweneuyo wakawa chiuta zuwa) pamoza na fumu. Sono Apollo uyu wakachemekanga 'wakuwuskapo viheni.' Iyo waukangako viheni kufuma ku wanthu. Iyo wakuwatumbika iwo ndipo wakawa chiuta mweneko kwa iwo. Iyo wakenera kusambizga wanthu. Iyo wakapataura za kusopa, na mitheto ya mutempele, mauteweti kuwachiuta, vya zisembe na nyifwa ndipo na umoyo pamasinda pa nyifwa. Nthowa iyo wakachitiranga ivi yikazira muntchimikazi yeneiyo yikakharanga pa m'pando wamarundi ghatatu. Kasi! Imwe mukuwona ichi? Iyi apa ntchimikazi yakuchemeka Yezebeli ndipo iyo yikusambizga wanthu. Ndipo iyo chisambizgo chake chikupuluska wateweti wa Chiuta na kuwapangiska iwo kuchita uzaghari. Sono uzaghari chikung'anamura 'kusopa vikozgo.' Icho ndicho chin'ganamuro chake chakuwuzimu. Mbumoza wambura kuzomerezgeka. Umoza wa Ahabu na umoza wa Kositantini wose uwiri uwo ukawa wakukanizgika. Wose wawiri uwo wakachitanga uzaghali. Muzaghari waliyose wamumalira munyanja ya moto. Chiuta ndimo wakayowoyera.

Sono, Chisambizgo cha Mpingo wa Katolika (mpingo ngwanakazi, ni mwanakazi) wakukana Mazgu gha Chiuta. Papa mweneuyo nkhanira ni Apollo mukayowoyero kasono wasambizga wanthu kuti wajibatike iwo wene kuvikozgo. Mpingo Wachiroma sono wazgoka ntchimikazi yitesi kuwanthu chifukwa waukako Mazgu gha Yehova kuwanthu nakupeleka fundo zake na zake ngati ndizo zikupeleka chigowokero chazakwananga, kweniso vitumbiko vya Chiuta; ndipo wasofi waluta kutari chomene mpaka kuyowoya pakweru kuti iwo wanankhongono mu umoyo pera chara kweniso na munyifwa. Iwo wokusambizga pa iwo wene kuti kuli puligatoriyo, kweni imwe mungachisanga chara icho Mumazgu. Iwo wokusambizga kuti mapemphero na misa na ndarama viti vimufumyaninge imwe mu puligatoriyo nakunjira kuchanya. Dongosoro lose leneiro lilikuwika pakusambizga kwake ndautesi. Ilo ndakuzikika palufura lwakufikapo lwauvumbuzi wa Chiuta mu Mazgu Ghake chara kweni ndakuzikika pa muchenga wambura chikhazi, wakutitimira, wamautesi ghake gha udeyelekezi.

Mpingo ukalutirathu kufuma muwupu kuluta mubungwe ndipo pakuchita ntheura ukanjira muchisambizgo chautesi. Uwo mbunenesko. Wakatolika Wachroma wakugomezga yayi kuti Chiuta wali mu Mazgu Ghake. Yayi bwana. Usange iwo wachitenge ntheura iwo mphanyi wang'anamuka nakukhozgera, kweni iwo wakuti Chiuta wali mumpingo Wake. Cheneicho chatenge chipangengi Baiboro kuwa mbiri ya makani gha Mpingo wa Katolika. Cheneicho chili ntheura yayi. Wonani cheneicho iwo wakachita ku ubaptizo wa maji wekha. Iwo wakaufumiskapo pakuwa Ubapatizo wa Chikhristu nakuwupanga iwo wautesi na wa mmaudindo. Lekani ine nimuphalirani za chakuchitika cheneicho ine nkhaba nacho na musofi wachikatolika. Msungwana mweneuyo ine nkhamubapatiza nyengo yimoza wakazgoka wa Katolika, sono musofi wakakhumbanga kunifumbapo ine za iyo. Iyo wakafumba mutundu wa ubapatizo uwo iyo wakapokera. Ine nkhamuphalira iyo kuti ine nkhamubapatiza iyo Muwubapatizo wa Chikhristu weneuwo ni mutundu wekha uwo ukawapo uwo nkhaumanya. Ine nkhamubizga iyo m'maji Mzina la Fumu Yesu Khristu. Msofi wakayowoya kwa ine kuti pa nyengo yinyake Mpingo wa Katolika ukachitanga ivi. Penepapo ine nkhamufumba iyo nyengo yeneiyo apo, Mpingo wa Katolika ukachitanga ivi, pakuti ine nilikuwerenga mbiri za makani ghawo ndipo nkchuchisanga yayi cheneicho iyo wakayowoya. Iyo wakaniphalira kuti chikasangika mu Baiboro, nakutiso Yesu wakaunjika Mpingo wa Katolika. Ine nkhamufumba iyo usange iyo wakughanaghana kuti Petros wakawa nadi papa wakudanga. Iyo wakasimikizga kuyowoya kuti Petros wakawa. Ine nkhamufumba iyo usange misa yikayowoyekeranga mu Chilatini mumaro mwakuti kusimikizgike kuti iwo wakanyoloskanga ndipo vingasinthika yayi. Iyo wakayowoya kuti uwo mbunenesko. Ine nkhamuphalira iyo kuti ine nkughanaghana kuti iwo wakapulukira kutari kufuma kucheneicho wakawa nacho pachiyambi. Ine nkhamumanyiska iyo kuti usange Mpingo wa Katolika ugomezgenge nadi Buku la Milimo ipo ine nkhaba Mukatolika wachikale. Iyo wakaniphalira ine kuti Baiboro yikawa mbiri yakulembeka ya Mpingo wa Katolika nakuti Chiuta wakawa mumpingo. Ine nkhasuskana nayo iyo chifukwa Chiuta wali mu Mazgu Ghake. Lekani Chiuta wawe munenesko kweni munthu waliyose mutesi. Usange imwe mukuwuskako panji kusazgako ku Buku ilo, Chiuta walikulayizga kuti iyo

wati wasazgilengeko vilengo kwa weneawo wakusazgilako na kutolako chigawa chawo kufuma ku Buku la Umoyo usange wakutolako kwa ilo. Chivumbuzi 22:18, 19.

Munizomelezge ine kulongora waka umo Mpingo wa Chiroma Katolika ukugomezgera kuti Chiuta wali mumpingo m'maro mwa Mazgu. Apa pali chigawa chakutoleka mubuku la Papa Yohane wa 23. "Vyakunichitikira vyane muvilimika ivi vitatu ngati ni Papa, pakuti 'muwofi na kumbwambwantha' ine nkhausomera uteweti uwu *mukujilambika kweneko Kukhumbiro la Yehova, leneiro likapika kwa ine kwizira Mukoleji ya Kupatulika ya Makadinoro muwungano wapadera*, vikupanikizgira ukaboni kufundo yakuzomelezgeka iyi kuti njakukhwaska na yachifukwa chakulutilira kwane kuwa munenesko ku ichi; kugomezga kwakufikapo mwa Chiuta, muvyose vyeneivyo vikukhwaskana na nyengo yino, na mtendere wambura kalema kukhwaskana na vyakunthazi." Papa uyu wakwandura kuti Chiuta wakayowoya kwizira mumpingo kuvumbura khumbiro Lake. Mbutesi uli. Chiuta wali mu Mazgu Ghake ndipo wakuyowoya na Mazgu kuvumbura khumbiro Lake. Iyo wakwanduraso kuti iyo walikuwika chigomezgo chakufikapo mu Mazgu gha wanthu ndipo wakughapulikira igho kwambura nthimbanizgo. Vikupulikikwa makora chomene kweni nivyautesi. Mwakuyana waka na nthimbanizgo mu Munda wa Edeni.

Sono tiyeni ise tirute pachanya apa mu Chivumbuzi 17 ndipo tiwone mwanakazi uyu, mpingo, mweneuyo wakukhara pa mauvumbuzi gha utesi kuti pa Mazgu gha Chiuta yayi. Muvesi la 1 Chiuta wakumuzunura iyo kuti muzaghari mukuru. Chifukwa ntchichi icho iyo walili muzaghari? Chifukwa iyo wali muvikozi. Iyo wakolelera wanthu muchinthu chenechichi. Kasi machilisko ghakusopa vikozi ntchichi? Mazgu gha Chiuta. Ipo mwanakazi uyu ni muzaghari chifukwa waleka Mazgu. Uyo apo wakukhara pa maji ghanandi, cheneicho chikung'anamura kuti maumba gha wanthu. Uwu nadi ulikwenera kuwa Mpingo utesi chifukwa mpingo wa Chiuta nguchoko – mbachoko weneawo wakuwasanga iwo.

Wonani cheneicho iyo wali mu maso gha Chiuta, palije kanthu kwali ngwakutowa mwakuzizika uli ku wanthu ndipo na umo iyo

wakumyamyatizgira uli pakupulikikwa. Iyo wakazuzgika muwulowevu pa mauzaghari ghake. Sono iyo wakalowera na ndopa za wakukomeka. Ngati ni Yezebeli mweneuyo wakakoma zintchimi na wasofi na kupalanya wanthu wa Chiuta weneawo wakakana kujikama pasi na kusopa Baala. Ndipo icho ndicho cheneke cheneicho Mpingo wa Katolika ukachita. Iwo wakakoma wara weneawo wakakana kujikamira pasi kumuwuso wa wupapa. Iwo weneawo wakakhumbanga Mazgu ya Chiuta mu maro gha mazgu gha wanthu wakakomekanga, kenekanandi munthowa za nkhaiza. Kweni mpingo uwu weneuwu ukachitanga munyifwa ukawa wakufwa iwo wene ndipo kuti ukumanya yayi ichi. Mukawavye umoyo mwa iwo ndipo pakawavye vimaryikwiro vyakuwulondezgapo iwo.

NYENGO YA KUNG'ANAMUKA

Chivumbuzi 2:21, “Ndipo nkhamupa nyengo yakuti wang’anamuke mu mtima; ndipo kuti wakukhumba chara kung’anamukako ku uzaghali wake.” Kasi imwe mukumanya kuti mpingo uwu ukawa uheni chomene kuluska Ahabu? Kasi mukumanya kuti iyo wakang’anamuka pa kanyengo kachoko waka na kwenda makora ghene panthazi za Chiuta? Imwe mungayowoya yayi icho za Mpingo wa Chiroma Katolika. Yayi bwana. Iwo undang’anamukepo kweni waparanya mwamutafu waliyose na wose weneawo wakayezga kuwuwira iwo kuti ung’anamuke. Iyo ni mbiri ya makani. Sono Chiuta kuti wakhara wakuwuska mathenga pera yayi ku muwiro uliwose kweni Iyo wakauskangaso wowwiri wakuziziswa wa mathenga ghara. Iyo wapakereka ku muwiro uliwose wanthu wakuziziswa wa Chiuta ndipo iwo wakachita chilichose cheneicho iwo wangachita kuti watolere mpingo kuwelera kwa Chiuta. Chiuta nadi wakamupa iyo mwawi na wowwiri kuti wang’anamuke. Kasi iyo wakang’anamuka na kuwoneska kuti iyo wakachitanga na vipambi vyake? Yayi bwana. Iyo wandachitepo ndiposo iyo wazamuchipo yayi. Iyo ngwakulowera. Iyo walikutaya zero zake muvinthu vyauzimu.

Sono mungawanga wakutimbanizgika na kwamba kughanaghana kuti Mpingo waku Roma ulikurapa za kukoma kwake kwa watuwa chifukwa iwo ukuyezga kukolelerana na Wamupatuko pakupanga visambizgo vyake kuti vikoleleraneko na visambizgo vya Mipatuko. Palije

na nyengo nanga njimoza yeneiyo iwo ulikupepeskapo na kuyowoya kuti iwo ukananga chifukwa chaukomero wake wa umba. Ndipo iwo uchitengepo yayi. Ndipo nanga ungawoneka wakufwasa na kunowa ili pa nyengo iyi, iwo uzamuwukaso na kukoma, pakuti kukoma kukugona mu uheni wake na mtima wake wambura kung'anamuka.

CHERUZGO KUSUSKANA NA MUZAGHALI CHAPELEKEKA

Chivumbuzi 2:22–23, “Ehena, nizakumponya pa Chitara, ndipo awo wakulewana nayo nkhuwaponya musuzgo yikuru, usange walive kung'anamukako ku milimo yake. Ndipo wana wake nditi wakomenge na nyifwa; Ndipo maekleziya ghose ghati ghamanyenge kuti Ine Ndine wakusanda sana mitima, ndipo nditi ndimupaninge yumoza yumoza kwakuyana na milimo yinu.”

Vichi? Mwanakazi uyu wana wana? Ndipo iyo ni muzaghali? Usange nthaura ndimo vilili kuti iyo wakawa na wana kufumira mu mauzaghali ghake ipo iyo wakwenera kotcheka na moto ngati umo Mazgu yawowoyera. Uwo mbunenesko weneko. Uwo mbumaliro wake pakuti iyo wazamupya na moto. Iyo umaliro wake ni nyanja ya moto. Kweni imani na kughanaghanapo naza wana awa pa nyengo yichoko waka. Mwanakazi ndiyo mweneuyo wana wakwiziramo. Ntchakumanyikwa kuti mwanakazi uyu wakawa na wana weneawo wakafuma mwa iyo kweni iwo wakachita chinthu chakuyana na icho iyo wakachita. Munilongore ine mpingo umoza weneuwo ukafumamo mubungwe ndipo iwo ukaweilelamoso yayi mu icho. Palije na umoza. Naumo yayi. Waluterani wakafumamo ndipo pa masinda wakaweleraso muchibungwe ndipo muhanya uno iwo mbakukolerana nawo mawoko mu mendeskero gha kasopero. Wa Methodisiti wakafumamo ndipo iwo wakaweilelaso na kubungwe. Wa Pentekoste wakafuma ndipo wakapangaso bungwe. Kuwengekoso kufuma kunyake, ndipo Chiuta walumbike iwo wazapangaso bungwe yayi chifukwa iwo wakumanya unenesko. Umba uwo uzamuwa nthombi ya zuwa la umaliro.

Sono panguyowoyeka apa kuti muzaghali uyu wakawa na wana. Sono kasi wakawa vichi iwo? Iwo wakawa wana wanakazi, pakuti iwo

yikawa mipingo ngati umo walili iyo. Sono apa pali fundo yakukondweska chomene. Yezebeli na Ahabu wakawa na mwana mwanakazi. Mwana mwanakazi yura wakatengwa kwa Yehoramumu mwana mwanalume wa Yehoshafati ndipo mu Mathemba yachiwiri 8:16 mukuyowoyeka kuti “Yehoramumu wakenda munthowa za wiske-vyara.” Iyo wakanjira mukusopa vikozgo na nthengwa iyi. Iyo wakatolera Yuda wakopa Chiuta na wakusopa Chiuta mukusopa vikozgo. Cheneicho nadi ndicho wana wanakazi wa mipingo wachita, ngati umo ine nanduliraso kale kwa imwe. Iwo wakwamba mu unenesko na kutengwa muchibungwe na kuleka Mazgu na kulondezga mutheto, na vipulikano na vinyake vya nthaura. Sono ipo ine niwone ichi apa mu wa Heberi 13:7 mukuyowoyeka kuti, “Pulikirani awo mbachilongozi winu weneawo wakamuphalirani imwe Mazgu gha Chiuta.” Ni Mazgu agho ghakutiisa ise, wanthu yayi. Sono mwanalume ngati m’fumu ni mutu wa mwanakazi. Iyo wakumuwusa iyo. Kweni m’pingo ni mwanakazi, nawoso, ndipo chirongozgi wake ni Mazgu. Yesu ni Mazgu. Usange iwo ukukana Mazgu na kutora urongozgi unyake uliwose ndikuti iwo nguzaghali. Sono imwe munizunulire ine mpingo umoza weneuwo undaleke Mazgu na kulondezga mitheto na vipulikano. Iyo yose njizaghali – umo walili nyina, ndimo walili mwana mwanakazi.

Kasi chirango cha muzaghali na wana wake chizamuwa vichi? Enya, chizamuwa munthowa ziwiri. Chakudanga iyo wakati, “Tindiponyenge iyo muchitara.” Kwakulingana na chigawa cha umaliro cha vesi la 22 chizamukuwa chitara cha nthombozgo, panji nthombozgo yikuru. Icho ndicho chira Yesu wakayowoya mu Mateyu 25:1–13. Pakawa wamwali wakulangwa khumi. Wankhonde wakawa wakuchenjera ndipo wankhonde wakawa wakupusa. Wankhonde wakuchenjera wakawa na mafuta (Mzimu Mtuwa) kweni wankhonde wanyake wakawavye. Para ntchemelezgo yikati yaluta, “Ehena mwene nthengwa wafika,” wakupusa wankhonde wakachimbira kukapenja mafuta penepapo wa mwali wakulangwa wa nkhonde wakuchenjera wakanjira mukati munthengwa. Wankhonde wara wakakhara kuwaro wakalekeka ku nthombozgo yikuru. Icho ndicho chizamuchitikira ku wose weneawo wakuluta yayi muchikwera. Icho ndicho chizamuwira muzaghali na wana

wake wanakazi. Chachiwiri, kwayowoyeka kuti iyo wazamuwakoma iwo na nyifwa panji ngati umo kung'anamulira kwenecho-kwenecho mukayowoyero, "Warekani iwo kuti wakomeke na nyifwa." Aka nkhayowoyero ka chilendo. Ise tingayowoya, "mulekani munthu wakomeke pa kupayikika na kumukaka na mukusa, panji pakumomizga na magesi panji nthowa yinyake ya padera." Kweni apa pakuti, "Kuwareka iwo kuti wakomeke na nyifwa." Nyifwa iyo yene ndiyo yizamupangiska iwo kufwa. Sono nkikhumba imwe muwone ichi pakweru ndipo ine nitolengeso chiyerezgero chithu cha mwana mwanakazi wa Yezebeli kutengwa munyumba ya Yuda na umo wakayitolera mukusopa vikozgo na kupangiska Chiuta kumupeleka Yuda kunyifwa. Icho ndicho Balaam wakachita, nayoso. Sono apa pakawa Yezebeli na kuleka kugomezga kwake. Padera apo pakawa Yuda wakujisopera makora ghene Chiuta na kukhara pasi pa Mazgu. Mbweni Yezebeli watengweska mwana wake mwanakazi kwa Yehoramu. Nyengo yeneiyo ichi-chikuchitika, Yehoramu wakupangiska wanthu kuwa wakusopa vikozgo. Nyengo yeneiyo nthengwa yikachitika Yuda wakafwa. Nyifwa ya uzimu yikanjira. Nyengo yakudanga apo mpingo waku Roma ukapanga bungwe, ukafwa. Nyengo yeneiyo wa Luterani wakapanga bungwe, nyifwa yikiza ndipo iwo wakafwa. Wa Pentekosite wakiza pa umaliro ndipo iwo wakapanga bungwe. Mzimu ukafumapo, nangauli iwo wakugomezga yayi ichi. Kweni lwo ukafumapo. Nthengwa yira yikiziska nyifwa. Penepapo ungweru wa Umoza wa thunthu la uchiuta ukiza. Iwo nawoso wakapa bungwe ndipo wakafwa, nawo. Ndipo pa masinda pake moto wa Chiuta wukati wawa pa Dambo la Ohio mu 1933 chithuwusko cha machilisko chikapyera charu chose, kweni chikizira mubungwe lililose yayi. Chiuta wakaukamo mu maguru gha wa Pentekosite, kuwaro kwa bungwe, ndipo icho lwo wazamuchita ku nthazi chizamuwa chakuwaro kwa bungwe, nachoso. Chiuta wangagwira ntchito muwakufwa yayi. Iyo wangagwira ntchito kwizira muviwaro VYAMOYO. Viwaro vira vyamoyo vili kuwaro kwa Babyloni.

Sono imwe mukuona, "Nyifwa" panji "Bungwe" vikafika, ndipo mpingo ukafwa, panji kuchipanga icho kuti chipulikikwe makora nyifwa ndiyo yikakhalamo mwenemula apo nyengo yichoko waka kumasinda ni

UMOYO pera uwo ukawusanga. Ngati umo Eva wakudanga wakiziskira nyifwa ku mutundu wa munthu ndimo sono bungwe lizira na nyifwa, Pakuti bungwe ntchakupangika na wakutimbanizga wawiri, Chinikolayiti na Chibalaamu, chakupangika na ntchimikazi Yezebeli. Sono Eva mphanyi wakawotcheka pa moza na njoka chifukwa cha mulimo wawo uheni. Kweni Adam wakajandizga, pakumutora iyo luwiro kwa iyo mwene mwakuti wakaponoskeka. Kweni para kasopero aka ka Satana katicalutenge kunjililira mu miwiro, pazamuwavya munthu wakujandizga, ndipo iyo wazamuwotcheka pamoza na uyo wakumupuluska, pakuti muzaghali na wana wake na wachigaluka na Satana wamusanga maro ghawo munyanja ya moto.

Penepapa apa ine nijidangilirenge ndamwene ndekha ndipo panji ine nkhwenera kuti nisungeko ichi chifukwa cha uthenga wa muwiro wa umaliro, kweni chikuwoneka waka chakwenelera kuchiwikamo mukati sono nthaura chifukwa chikulongosola mwapakweru chomene za bungwe ndipo na ivyo vichitikenge kwizira mwa ilo. Ndipo nkhwumba kumuchenjezani imwe. Chivumbuzi 13:1-18, "Ndipo nkhwona chikoko chakuzuwuka mu nyanja, chakuwa na masengwe khumi, na mitu yinkhonde na yiwiri, ndipo pa masengwe ghake mphumphu khumi, ndipo pa mitu yake mazina gha matusi. Ndipo chikoko icho nkhwawona chikakozgana na nyalubwe, ndipo marundi ghake ghakawa nga barasisi, na mlomo wake nga ndi mlomo wa nkhamo; ndipo chinjoka chikachipa nkhangongo zake, na chizumbe chake, na mazaza ghakuru. Ndipo mutu wake umoza ukawa nga ngwakulasika nga lingafwa; ndipo bamba lake la nyifwa likachizgika: ndipo charu chapasi chose chikazukuma na kuchirondezga. Ndipo wakachirambira chinjoka, pakuti chikapa mazaza ghake mu chikoko: ndipo wakalambira chikoko, wakati, ndi njani wakukozgana na chikoko? Ndipo ndi njani wakumanya kurwa nacho? Ndipo chikapika mlomo kuyowoya vinthu vikuru na matusi; ndipo chikapika mazaza ghakuchitira mlomo wake myezi makhumi ghanayi na yiwiri. Ndipo chikabanura mlomo wake kumuyowoyera matusi Chiuta, kutuka Zina lake, na weneawo wakukhara mu chihema Chake kuchanya. Ndipo chikazomelezgeka kurwana na watuwa, na kuwatonda: Ndipo chikapika mazaza pa fuko lose, na wanthu, na lulimi na mtundu. Ndipo

wose awo wakukhara pa charu cha pasi wati wachilambirenge, yose uyo zina lake lilive kulembeka mu Buku la Umoyo la Mwana-Mberere Mweneuyo wali kukomeka kufuma kumtendeko wa charu. Usange munthu wali na khutu wapulike. Yose uyo wakwimikikira wuzga, ku wuzga wakuluta: Yose uyo wakukoma na lupanga, nalupanga wakwenera kukomeka. Penepapo ndipo pali uchivindwe wa watuwa na chipulikano chawo. Ndipo nkhwawona chikoko chinyake chakufuma ku charu cha pasi; ndipo chikawa na masengwe ghawiri ngati nga mwanamberere, ndipo chikayowoya nga ndi chinjoka. Ndipo chikuchitira mazaza ghose gha chikoko chakudanga pa maso pake, ndipo chikuchita kuti charu na awo wakukhara mwenemumo wachilambire chikoko chakudanga, cheneicho bamba lake la nyifwa likachizgika. Ndipo chikuchita vimanyikwiro vikuru, mwakuti chichitiske na moto uwo kwikha pa charu kufuma kuchanya pa maso pa wanthu. Ndipo chikuwapusika awo wakukhara pa charu cha pasi na vimanyikwiro ivyo chikazomerezgeka kuchita pa maso pa chikoko; pakuwanenera awo wakukhara pa charu, kuti wachichitire chikozgo chikoko icho chikawa na bamba la lupanga, ndipo chikakhaliira cha moyo. Ndipo chikazomelezgeka kuti chipe mvuchi chikozgo cha chikoko, mwakuti chikozgo cha chikoko chiyowoyenge, ndiposo chichitenge kuti wose awo wangaleka kulambira chikozgo cha chikoko wakomeke. Ndipo chikuwachitiska wose, wachoko na warara, wasambazi na wakavu wanangwa na wazga, kuti wasimbike lusimbo pa woko lawo la maryero panji pa chene chawo: na kuti pawavye munthu wangamanya kugura panji kusaska, kweni uyo wali na lusimbo pera, ndilo zina la chikoko panji kapendekero ka zina lake. Penepapa ndipo pali vinjeru. Uyo wali na mahara, wapende kapendekero ka chikoko: chifukwa nkhapendekero ka munthu; ndipo kapendekero kake ndi makumi pera makumi ghankhonde na limoza na makumi ghankhonde na limoza pachanya kankhonde na kamoza.”

Mazgu agha ghakurongora nkhongono ya Mpingo wa Roma wakatolika na cheneicho iwo uzamuchita kwizira muchibungwe. Kumbukani iyi ni mpheska ya Utesi. Lekani yizunure Zina la Yehova, yikuchita nthaura muwutesi waka. Ulongozgi wake ngwa Yehova yayi kweni ngwa Satana. Iwo pakumala kwake nadi ukuwonekera pa moza na

chikoko. Mzaghali kukwera pa chikoko chiswesi chikulongora pakweru nkhangono zake mu chiuta wa ntchichizgo (Satana) ndipo Chiuta withu yayi, Fumu Yesu Khristu.

Mu vesi 17, Chikulongolerathu pa kweru kuti iyo wazamutora muwuso weneko wa vyamalonda gha charu, pakuti paliye munthu uyo wanga gula nesi kuguliska padera pa iyo. Ivi vikufumira mu Chivumbuzi 18:9–17 peneapo pakuwoneska kuchita nawo kwake na mathemba, wakaronga, wamalonda, wose weneawo wakwenera kuchita na Roma na malonda.

Muchivumbuzi 13:14, ise tikusambira kuti chikoko chikutandazga machitiro ghake kwizira mu chikozgo cheneicho chikazengekera kwa iyo. Chikozgo cheneicho chilikupangika niwupu wa chikolererano cha visopo mucharu chose, mwenemumo mipingo yose yakuwungana yizamukhara pa moza na Roma wa Wakatolika (iwo wakuchita ichi na sono wuwo.) Ntchamachitiko nkhanira kuti umoza uwu uti wizenge mu maro mwakulekeska nkhangono ya masanganawana. Kweni pakuti masanganawana ngati Nebukatinezera wa uskikira muchanya kotcha thupi la mzaghali, Roma wazamutheleskeka na kuparanyika. Manyani kuti kulikose uko mpingo Wachiroma ukaluta, masanganawana ghakalondezga. Vili kwenera kuwa nthaura. Ndipo lekani ine ni muchenjezgani, imwe sono, munga ghanaghananga kuti masanganawanga ndiyo mulwani winu yekha. Yayi bwana. Ni Mpingo wa Katolika nawoso, ndipo panji na kujumphizgaso.

Sono tiyeni ise tiwelenge Chivumbuzi 13:1–4, na kuyaniska ichi na Chivumbuzi 12:1–5. Chivumbuzi 13:1–4, “Ndipo nkawona chikoko chakuzuwuka mu nyanja, chakuwa na masengwe khumi, na mitu yinkhonde na yiwiri, ndipo pa masengwe ghake mphumphu khumi, ndipo pa mitu yake mazina gha matusi. Ndipo Chikoko icho nkachiwona chikakozgana na nyalubwe, ndipo marundi ghake ghakawa nga nga barasisi, na mlomo wake nga ndi mlomo wa nkhamo; ndipo chinjoka chikachipa nkhangono zake, na chizumbe chake na mazaza ghakuru. Ndipo mutu wake umoza nga ngwakulasika nga lingafwa; ndipo bamba lake la nyifwa likachizgika: ndipo charu cha pasi chose chikazukuma na kuchilondezga. Ndipo wakachilambira chinjoka pakuti chikapa mazaza ghake ku Chikoko: wakati ndi njani wakukozgana na chikoko?”

Ndipo ndi njani wakumanya kurwa nacho?" Chivumbuzi 12:1-5, "Ndipo chimanyikwiro chikuru chikawoneka kuchanya; mwanakazi wakuwwalikika na dazi, na mwezi ku marundi ghake kusi, ndipo pa mutu wake mphumphu ya nyenyezi khumi na ziwiri: ndipo wakawa na nthumbo, ndipo wakakutanga, uku wali na mihero na urwirwi pa kubaba. Ndipo kukawoneka chimanyikwiro chinyake kuchanya; ndipo ehena chinjoka chikuru chiswesi, chakuwa na mitu yinkhonde na yiwiri masengwe khumi, ndipo pa mitu yake mphumphu zinkhonde na ziwiri. Ndipo muchira wake ukaguza chigawa cha chitatu cha nyenyezi za kuchanya, ndipo ukaziponya pasi pa charu: ndipo chinjoka chikimanga panthazi pa mwanakazi uyo wakawa pafupi kubaba, mwakuti para wababa chimyangure mwana wake. Ndipo wakababa mwana – mwanalume, uyo wati wausenge mitundu yose na ndodo ya chuma: ndipo mwana wakakwapulikira kwa Chiuta, na kuchizumbe Chake." Satana na chisopo chake cha Usatana wali mu vikoko ivi viwiri uwo. Muchivumbuzi 14, chikoko chira chikapwetekeka kufikira kunyifwa kweni chikawaso cha moyo ni ufumu wamtafu wa Roma wachisamunda wenuwo ukathera kukukomeka kukuru na wababariya ndipo penepapo ukutaya nkhongono zake pa kanyengo. Kweni iwo ukasangaso izo mu Roma wa upapa. Kasi mukuchiwona ichi? Fuko leneiro likausa pakubwangandura wose ndipo leneiro likazgoka ufumu wa nkhongono chomene wenuwo ukamanyikwapo, pa umaliro likapwetekeka na kufwa. Nkhongono zake zikamara mu thupi chifukwa cha kuwusa kwizira mu wasilikari na vinyake vya ntheura. Kweni pasi pa Kositantini iwo ukaweleraso ku umoyo, pakuti Roma wa upapa wanjillira mu charu chose, ndipo nkhongono zake nzakufikapo. Iyo wakugwiliska mathemba na wasambazi chomene ndipo mu chisopo chake cha nyifwa na nkhongono za chuma iyo wakulamura ngati chiuta mwanakazi wa muwiro uwo wasono. Iyo ndiyoso chinjoka chira chikima kulindilira kuti chimilimitizge mwana mwanalumi. Herodi wakayezga kukoma Fumu Yesu ndipo wakatondeka. Pamasinda pake Yesu wakapayikika na wasilikari wa Chiroma, kweni sono wakwatulikira kuchanya ku chizumbe.

Sono pamoza na icho nayowoya waka sono sono apa, kumbukirani mboniwoni ya Daniyeli. Chigawa cha umaliro cha chikozgo, nkhongono za umaliro za charu zikawa mu marundi. Icho chikawa chisuru na dongo.

Wonani chisuru ni Ufumu wa Chiroma. Kweni sono kuti ni chisuruso chikhukhola yayi. Dongo lasazgikirako mukati mwake. Ndipouli ulipo ndipo ukwendeska nkhani za charu mu mafuko gha mazaza gha kujiusa na mafuko gha muwuso wa nkhasa. Mpingo wa chiroma uli mu fuko lilirose. Vyose vyasazgikana mwenemumo.

Nizomelezgani ine kuti nimupani imwe kanthu kanyake kachoko paza chisuru na dongo. Kumbukani para Khrushchev wakatimba skapato yake pa desiki pa ungoro wa U.N? Enya pakawa mafuko ghankhonde ghakumafumiro gha dazi na mafuko ghankhondeso gha kumanjiliro gha dazi. Khrushchev, wakayowoyera gha dazi ndipo Eisenhower wakayowoyera ghakumanjiliro gha dazi. Mu chiyowoyero cha Russia, Khrushchev chikung'anamura dongo ndipo Eisenhower chikung'anamura kuti chisuru. Walongozgi wakuru wawiri wa charu chose, njowe zikuru ziwiri za kumarundi gha chisuru na dongo, zikawa uku na uku. Ise tili mu umaliro wa vyose vya ivyo.

Mundime ya 4, likufumba, "Ninjani mweneuyo wangamanywa kurwa na chikoko?" Soso pa nyengo iyi pali mazina ghakuru mu charu chose. Pali mafuko gha nkhangono, kweni sono nthena Roma ndiyo wakulamulira. Papa wali mu chitengo cha wakutchika. Ndipo nkhangono zake zisazgikilengeko. Paliye na yumoza uyo wanga na iyo.

Vesi 6, "Ndipo chikabanura mlomo wake kumuyowoyera—ma—tusi chiuta." (Kusambizga chisambizgo marango gha wanthu, wamutonyoro, wakujitunthumura, wakutemwa vya kusekeleska, wakuwa na kawonekero ka uchiuta ndipo wakuyikana nkhangono yake.) Iyo wakatuka Zina la Chiuta — kulisinthwa Zina lira ku maudindo na kukana kuchitira pakunyake.

Vesi 7, "Ndipo chikazomelezgeka kurwa na watuwa." Kuzikizga — nyifwa ku wakugomezga wa unesko na wose mu Zina la Fumu na chakulata chakuti zina la Chiuta litukike ngati umoso vilili mu Russia, chifukwa cha ivyo chisopo cha Chikatolika chikachita kura.

Vesi 8, "Ndipo wose awo wakukhara pa charu (wose weneawo mazina ghawo ghandalembeke mu Buku la Umoyo la Mwanamberere uyo walikukomeka kufuma ku mtendeko wa charu) wati wachilambirenga icho."


Wa wongeke Chiuta mberere ziti zichilambirenge yayi icho. Waliyose kweni kupaturako wakusoleka ndiwo wazamupusikika chara. Pakuti iwo wakupulika mazgu gha mliska. Ndipo iwo wakumulondezga Iyo.

Sono pera, wonani ichi, cheneicho ise tayezganga ku mlongorani imwe. Mbuto iyi ya nyifwa iyo yikamba mu muwiro wakudanga — mbuto iyi ya bungwe, pa umaliro yakura kuzgoka khuni mu leneiri chiyuni chilichose cha nthonho chikukhalamo. Mwakususkana na kujizunura kwake kuti iyo ndiyo wakupereka umoyo, Iyo wakupereka nyifwa. Chipaso chake ni NYIFWA. Iwo awo wakuchita nayo mbakufwa. Aka kaluso ka nkhangono ka mpingo wa charu chose keneako kakupusiska charu chose kuti mwa iyo muli chiponosko cha kuthupi na ku uzimu ka kupusika na kugaranya mizinda. Pakuti iyo kuti ndi nyifwa pera yayi kweni chilengiwa ichi cha nyifwa icho chene chizamukomeka na nyifwa yeneiyo ni nyanja ya moto. Okwe, mphanyi wanthu wangumanya umo umaliro wawo uzamuwira pakukhalilira mwa iyo. “Fumanimo mwa iyo, pakuti ntchifukwa uli icho muzamufwira?”

NTCHENJEZGO YA UMALIRO

Chivumbuzi 2:23. “Ndipo wana wake nditi ndiwakomenge na nyifwa; ndipo Maekleziya ghose ghati ghamanyenge kuti Ine Ndine wakusanda sana mitima: ndipo nditi ndimupaninge yumoza yumoza kwakuyana na milimo yinu.”

Chiuta wakulawiska pa mtima. Icho wandasinthe. Ndipo chizamusinthapo yayi. Apa, mu miwiro ghose muli maguru ghawiri, ghose ghawiri gha kuyowoya kuti uvumbuzi wawo ukufumira kwa Chiuta na ubale wawo na Chiuta. “Ndipouli lufura Iwa Chiuta liri kuyima nganganga mwaunenesko, lakuwa na chididimizgo ichi, *Yehova wakuwamanya awo Mbake.*” Timoteyo wachiwiri 2:19. “Yehova wakusanda mitima.” Lizgu lakuti ‘kusanda’ ‘likung’ anamura kukonkhoska panji ‘kulondelera.’ Chiuta wakukonkhoska maghanaghano ghithu (mitima); Iyo wakumanya icho chili mu mitima yithu. Iyo wakuwona milimo yithu yeneiyo ntchiwoneskero cheneko cha ivyo vili mwa ise. Ni mu mtima mwenemumo mukufumira ulunji panji uheni. Vyakukhumba vithu, vilato vithu — vyose vyakumanyikwa

pakweru kwa lyo naumo lyo wakudodoliska machitiro ghose. Ndipo uchitiro uliwose, lizgu lilirose lizamukweruzgika para chiwelengero cha myoyo yithu chapika. Mpheska yitesi yikawavye wofi na Chiuta ndipo mwa mutengo ukuru iyo yizamulipira. Zomelezgani kuti wose weneawo wakuzunura Zina Lake wakhare umo kuliri kwakwenelera watuwa. Ise tingapusiska wanthu kweni tingamupusiska yayi Yehova. 

Uthenga uwu wa M'bale William Marrion Branham, wakuthyika kuti *Mwanakazi Yura Yezebeli*, ukatoleka kufuma mu M'wiro wa Mupingo wa Tiyatira ndima ya buku lake la kuthyika kuwoneskera kwa *Miwiyo Ya Mipingo Yinkhonde Na Yiwiri*, ndipo ulikulembeka mukati umu kwambura kasinthiro ndipo ulikugawika nawa Voice of God Recordings.

CHITUMBUKA

©2007 VGR, ALL RIGHTS RESERVED

Mauthenga ghakudanga gha M'bale William Marrion Branham ghalikujambulika pa matepi, ghakujumpha 1100 ndipo ghalipo kale. Ghanandi gha mauphalazi agha ghali mu mabuku, ghakulembeka kwambura kusinthika. Matepi, madisiki, mabuku ma sinema, vithuzithuzi vya kujambura, na makani ghanyake gha kowwira kukhwaskana na utumiki wake charu chose—muchisanisani ghalipo kwizira pakulemba:

VOICE OF GOD RECORDINGS

P.O. BOX 950, Jeffersonville, Indiana 47131 U.S.A.

www.branham.org

Chimanyisko chakukopera

Wanangwa wose ngwakuvikiririka. Buku ili lingamanya kudindika pa chakudindira cha kunyumba kuwa lakugwiriskira ntchito imwe panji kuti liperekeke, kwaulere kwambura mtengo, nga ndi lakugwiriskira ntchito kutandazgira Ivangeli la Yesu Khristu. Buku ili nthu lingaguriskika, kupangikaso mu unandi, kutumizgika pa website, kusungika umo tingazakalisangiraso, kutanthauzika mu viyowoyero vinyakhe, panji kuligwiriska ntchito pa kupempeskera ndalama kwambura kalata yakulembeka kuzomerezgeka na Voice Of God Recordings®.

Kuti mumanye vinandi panji kusanga katundu munyakhe uyo waliko, chonde fumbani:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org